

E: herrietako festak

Oraingoan herriko eta inguruko herrietako jaien gainean arituko zara. Festazalea zara? Zeintzuk dira zure jairik gustukoenak? Zein iritzi duzu zure herriko jaien inguruan? Hori guztia argitu behar duzu ataza hau amaitu baino lehen.

Zuen herriko festetako programan ekintza berri bat sartzeko proposamena ere egingo duzue.



Herrietako jaiak

1.1



Ikus dezagun zenbat dakizun inguruko herrietako jaietarako lot itzazu herriak eta jaiak.

- | | |
|---------------------|-----------------|
| 1. Pentekoste jaiak | a. Aretxabaleta |
| 2. San Juanak | b. Gernika |
| 3. San Pedroak | c. Bergara |
| 4. Andramaixak | d. Oñati |
| 5. San Migelak | e. Zornotza |
| 6. San Bartolomeak | f. Eibar |
| 7. San Faustoak | g. Ordizia |
| 8. San Rokeak | h. Arrasate |
| 9. Karmenak | i. Eskoriatza |
| 10. Santa Anak | j. Elgoibar |
| 11. San Juanak | k. Durango |
| 12. San Pelaioak | l. Zarautz |



Binaka elkartu eta erkatu egin duzuenak.



Klase osoan zuzenketa egin.

"Nolako jaiak, halako gazteak"

Herri guztiak dira ezberdinak, festa guztiak dira ezberdinak. Horregatik, izaeraren edo zaletasunaren arabera, parranda non egin pentsatzea eta aukeraketa egitea da onena.

➔ **Irakur ezazu Gaztetxuloko testua.**



NOLAKO JAIAK, HALAKO GAZTEAK

Herri guztiak dira ezberdinak, festa guztiak dira ezberdinak. Horregatik, izaeraren edo zaletasunaren arabera, parranda non egin pentsatzea eta aukeraketa egitea da onena. Eta nolakoa zara zu?

Hona hemen zenbait ideia.

Destroyer-entzat

Berdin zaizu etxera itzultzeko autorik edo autobusik ez izatea. Are gehiago, etxetik irten orduko, argi zenuen gaupasa egingo zenuela. Horietakoa bazara, Oion (abuztuko azken asteburua), Biasteri (abuztuak 29), Lizarra (abuztuak 1) edota Bermeo-Elantxobeko jaietara (uztailak 22) joatea gomendatzen dizugu. Ez duzu lo-kuluxkarik egiteko paradarik izango. Oion, Biasteri eta Lizarran primeran pasatuko duzu, gazteek jaietarako propio prestatutako "txamizo-kobazulo"-etan. Dasta itzazu, huts egin gabe, gazteek eginiko edabe magikoak: zurrakapotea, sangria... Bestela, Oionen eta Biasterin, ardoa ez zaizu faltako. Bermeora joatea aukeratuz gero, ez ahaztu arrantzale zapia eramatea. Magdalena egunean, parrandazaleak Bermeotik Elantxobera joaten dira eta bertan, sekulako festa egiten dute. Izugarria!

Bekatarientzat

Oro har, Euskal Herriko jai gehienak santu baten inguruan egin ohi dira. Hala ere, badira besteak baino "fededunagoak" diren festak. Eta fededunen artean fededunetakoak Azpeitiakoak ditugu. Nola ez, bertan jaio baitzen San Inazio Bizkaiko eta Gipuzkoako zaindaria! Haren omenez, San Inazio egunean (uztailak 31), prozesioa egiten dute herriko kaleetan. Dotore-dotore jantzita, santuaren irudia sorbalda gainean hartuta, herriko kale nagusiak zeharkatzen dituzte, izerditan, gainerako herritarren begiradapean. Ez al dira nekatuko? Bekataria bazara, eta otoitz egin nahi baduzu, Azpeitiara jo dezakezu zure bekatuak "zuritzera". Noski, ez da komeni gero, gauez, Azpeitiako taberna zuloetan berriro bekatuak egiten hastea... Eta badira festa prozesiozale gehiago: Nafarroako Tulebras (abuztuak 19) eta Arabako Albeiz eta Araia (ekainak 23) herrietakoak, esaterako.

>>

>>

Folklorezaleentzat

Badira oraindik garai bateko festei eta ohiturei eusten dieten herriak: herri kirolak, trikitixa, dantzaldiak, koadrilen arteko jokoak, bertso saioak... Girotxo hau atsegin baduzu, gustura ibiliko zara Usurbil eta Ataungo Santa Ixabeletan (uztailak 2), Astigarragako Santiotan (uztailak 25) eta Igeldoko, Behintza-Labaiengo eta Erratzuko San Pedrotan (ekainak 29). Behintza-Labaienen, Erratzun eta inguruko herrietako jaietan Modesto musikaria da dantzaldietako errege. Berak, bakarrik, plazak betetzen ditu. Iaioa da Modesto musika tresnekin; gitarra, teklatuak eta esku soinua jotzeaz gain, abestu ere egiten baitu gizonak. Usurbilen, salda gozoa emango dizute gosaltzeko, eta klabelin zuri edo gorriak ere oparituko dizkizute. Eta Igeldon, gaua amaitutakoan, baratxuri zopa. Zerbait gehiago eska al daiteke?

Erromantikoentzat

Zure mutil edo neska-lagunarekin eskutik helduta lasai-lasai ibiltzea gogoko baduzu, zarata handirik gabeko jaietara jotzea duzu onena. Lapurdiko Larresoro (abuztuko azken asteburua) edo Nafarroa Behereko Bidarraiko (uztailak 14) jaiak xarma handia dute. Jaiotan, ez duzu jende uholdearen azpian zapalduta bukatuko. Dena dela, bada gustura ibiltzeko giroa: txarangak, herri bazkaria, haurrentzako jokoak, dantzaldiak... Jakina, pilota partida ederrak ikusteko aukera izango duzu, Ipar Euskal Herrian ohikoa baita jaietan pilota partidak antolatzea. Ostatuak ordu txikiak arte egon ohi dira zabalik aste-buruetan. Hala ere, parrandarik egiteko asmoa ez baduzue, astegunetan joatea duzue onena.

Kirolzaleentzat

Nork dio parranda eta kirola ez direla bateragarriak? Horixe bera egiten dute Bilboko konpartsek Aste Nagusian (abuztuaren hirugarren astea). Ez al da kirola txoznen paradisu batetik bestera ibiltzea? Orain, "Txomin Barullo"-ra; jarraian, Bizkaiko Emakumeen Asanbladarenera... Eta bien bitartean, joko eta lehiaketa dibertigarriak... Horrela hamar egunez, Marijaia erre eta bere errautsak Nerbioi ibaira bota arte. Dena den, seguru asko, doping azterketa egingo balute, askok ez lukete azterketa gaindituko! Eta kirolarekin jarraituz, ezin aipatu gabe utzi bestelako proba bitxiak. Astrabuduako San Lorentzotako (abuztuak 8) korrikalariak kuleru eta gantzontzilotan parte hartzen dute jaietako lasterketan.

Erriberako Marzillako San Bartolometan (abuztuak 24) aitzurra jaurtiketa txapelketa egiten dute. Hala ere, Kortezubiko Santiotan (uztailak 25) egin ohi dira Euskal Herriko kirol probarik bitxiak edo arraroenak -buruhandiena, tripandiena...-.



Pentsa ezazu zu zein taldetakoa zaren: destroyer-a, bekataria, folklorezalea, erromantikoa ala kirolzalea. Ez bazara talde horietako batekin ere identifikatzen, sortu bat zeure neurri-ra.



1.3



Hiruko taldeetan komentatu puntu hauek:

1. Zer deritzozue sailkapenari?
2. Zuetako inor sartzen da bete-betea horietako talderen batean?
3. Zuen ustez zein taldetakoak dira ohikoenak Euskal Herriko gazteen artean?
4. Azaldu zuetako bakoitzaren joerak.

2

Herriko jaietako programa

2.1

"Herriko jaietako programa"



Binaka eztabaidatu galdera hauen inguruan:

1. Zeintzuk dira zure herriko jairik politenak? Zergatik?
2. Herriko jaietan herrian egoten zarete ala kanpoan?
3. Herrian egoten bazarete, hartzen duzue parte jaietan? Nola edo zertan?
4. Zer dago soberan eta zer faltan zuen ustez?



Har ezazue jaietako egitaraua eta aztertu. Egitarauko zer da egokia zuentzat edo zuen adinekoentzat? Zergatik?



Denon artean hitz egin honetaz.

2.2

Lantxo honetan udaletxera idatzi beharko duzu zeuen gustukoa eta jaietako egitarauan txertatzeko modukoa den zerbait eskatzeko.

Hemen dituzu ideia batzuk:

- Ken 7ren edo Gatiburen kontzertua.
- Disko festa
- ...



Hirunaka jarrita, erabaki ezazue zer den eskatuko duzuen.



Eskaera idatzi, bakoitzak berea.



2.3

- Eskaerak horman eskegi.
- Gustukoena aukeratu.
- Nahi izanez gero, bidali udaletxera aukeratu duzuen.